

Setór Justisa Kontinua Hasoru Dezafiu Lubuk

DILI—Akademista husi Universidade Nasionál Timor-Leste (UNTL), José Tomas Alves, hatete, Timor-Leste selebra ona nia restaurasaun independénsia ba dala-24, setór justisa kontinua hasoru dezafiu lubuk, tanba prosesu sira tama iha Tribunál bafak Joos, maibé rekursu umanu sei menús tebes.

“Hanesan akademista haree katak, setór justisa durante tinan 24, einjerál la’o. Mezmu nune’e sei hasoru dezafiu lubuk mak, prosesu sira iha Tribunál la’o kle’ur. Dezafiu ne’ebé setór justisa hasoru, entre dezafiu sira-ne’e, ida maka prosesu ne’ebé la’o kle’ur iha Tribunál. Prosesu la’o kle’ur tanba asaun sira ne’ebé tama iha Tribunál ho volume aas, maibé juíz sira ne’ebé atu ka’er prosesu hirka ne’e número limitadu.” informa, José Tomas Alves, ba Timor Post, hafoin partisipa Komemorasaun Loron Restorasaun Independénsia ba dala-24, iha Tasi-Tolu, Kuarta, (20/05).

Nia esplika, dezafiu seluk mak públiku laiha asesu ba prosesu sira iha Tribunál, liuliu ba prosesu sira ne’ebé lei haruka atu nakloke ba públiku.

“Dezafiu ida-seluk maka públiku ein-jeral la’os, sira ne’ebé parte husi prosesu iha Tribunál, laiha asesu ba prosesu ne’ebé la’o iha Tribunál, liuliu prosesu ne’ebé lei haruka nakloke ba públiku, atu nune’e, públiku bele hatene loloos lala’ok justisa nian iha Tribunál, hodi la monu ba persepsaun públiku ka parte sira ne’ebé tama iha prosesu judisiál nian”, nia esplika.

Nia hatete, durante tinan 24 nia-laran, violénsia oioin akontese, liuliu ligadu ba violénsia doméstika, violénsia seksual no kazu korrupsaun,



José Tomas Alves

sira kontinua buras ba beibeik, tanba ne’e, governu presiza halo sosializasaun ba prevensaun.

Violénsia oioin akontese durante tinan 24 nia-laran, governu iha instituisaun oioin, ne’ebé servisu ka iha relasaun servisu ho setór justisa. Asaun ne’ebé instituisaun relevante sira governu nian presiza foti maka, halo sosializasaun kona-ba diploma legál sira ne’ebé regula kona-ba ema ida nia hahalo krime, violénsia no ninia konsekuénsia sira, atu nune’e, ema bele adapta no integra iha sosiedade ne’ebé diploma legál hirak-ne’e aplika ba.

Ho número violénsia ne’ebé sa’e maka’as, oinsá parte justisa presiza halo sensibilizasaun ba munisipiu sira, liuliu área remota ne’ebé susar tebes asesu ba justisa. Instituisaun sira governu nian, inklui ensiñu superiór sira, inklui UNTL, liuliu Fakultade Direitu kontribui mós ba atividade sensibilizasaun ida-ne’e.

“Ida-ne’e ezemplu konkretu ida ne’ebé Fakultade Direitu UNTL nian halo, liuhosi ninia atividade, bolu ho naran servisu ba komunidadade, iha ne’ebé ekipa fakultade nian tuun ba komunidadade sira iha área remota sira iha Timor-Leste, hodi halo sesibilizasaun ba ita-nia

komunidadade ne’ebé susar tebes asesu ba justisa. Ida-ne’e, bele konsidera forma ida oinsá mak bele hamenus ka redús violénsia ka krime sira,” nia akresenta.

Dekanu husi Fakultade Direitu UNTL ne’e rekomenda ba governu atu bele hadi’a di’ak liután área justisa. Governu tenke investe maka’as iha ensiñu superiór sira iha rai-laran, hodi forma jurista, ne’ebé preparadu hodi dezempeña iha setór oioin, la’os de’it iha área jurisdisionál, maibé, setór oioin vida jurídika nasional.

Iha fatin hanesan, Ministru Justisa, Sérgio da Costa Hornai, hatete, kona-ba progresu servisu iha setór justisa, governu kontinua esforsu hodi propoin rotéiru ba órgaun soberanu sira, hodi estabese Supremu Tribunál Justisa.

“Ohin diskursu Prezidente Repúblika nia rekomenda ba instituisaun Estadu nian, Ministériu Justisa ho inisiativa sira ne’ebé iha, propoin rotéiru ida ba iha ita-nia órgaun soberania Estadu, liuliu iha Konsellu Ministru hodi estabese Supremu Tribunál Justisa. Ida-ne’e hatudu ita-nia vízaun klaru katak, ita hakarak polítika reforma ida, atu nune’e, iha tinan 24 depois ita restaura ita-nia independénsia priense daudauk ona ita-nia atividade iha setór justisa nian,” Sérgio informa.

Governante ne’e hatutan, kona-ba rekursu umanu iha setór justisa governu nafatin esforsu hodi buka solusaun ba preokupasaun sira ne’e, laiha razaun ba kotuk, maibé tenke esforsu hodi responde ba preokupasaun públiku nian. (Jornalista: Mariquita da Silva/ Editor: Liduway Xavier)